

欽定剿平粵匪方略

欽定勦平粵匪方略卷九十五 甲寅年

五月二十四日

壬戌

和春福濟奏言臣等連日派

吉順等帶領官兵攻打賊營並派何朝亮等攻打北門常清等攻打東門並先期傳知西路珠克登等攻得勝水西兩門以分賊勢臣和春往來調度臣福濟在後路接應鄭魁士等冒雨揮兵奮勇攻擊賊營以槍礮回拒都司蕭開甲等

奮不顧身於槍礮如雨之中拔去梅花樁直抵
濠邊連拋火罐噴筒賊營登時火起該逆驚潰
越牆而逃卽乘勝搶過深濠擁入賊營盡力砍
殺斃賊無數立將大股賊營攻毀適南門突出
逆匪二三千人分路來撲當經鄭魁士蘇勒芳
阿帶兵迎勦立斃賊匪多名該逆旋敗入城追
至城下大東小東兩門又各突出逆匪二三千

人分路奔來欲抄我軍後路隨飭常清等兩路夾攻後路兵亦趕到各開槍礮立將逆首殲斃餘匪敗逃入城南門外尙存賊營數座隨令鄭魁士等分途攻擊我兵轉戰無前偏至濠邊拋擲火罐賊營火發復將賊營三座平毀自辰至申酣戰五時之久連奪賊營四座先後斃賊一千餘名生擒二十一名砍獲首級一百餘顆十

三日復攻打北門賊匪堅伏未出東南兩門各突出賊匪千餘人官兵三面夾擊斃賊三四百名生擒三名其水西得勝兩門亦各突出賊匪數百人經珠克登等率兵攻勦斃賊數十名該逆退敗入城勢極窮蹙其六安逆匪經該署知州茅念劬會合紳團並知會秦定三上緊進攻五月十二日探有逆匪二千人押解小車六十

餘輜裝運糧食向東南行走該州知會各勇截擊於八九十鋪等處攔頭堵截殲斃多名該逆棄車而逃殺賊一百餘名餘賊驚散入城臣等查六安廬州逆衆已成犄角之勢必須設法先復六安則廬州得手自易現飛飭該州密商紳勇迅圖克復並移知秦定三相機進剿奏入

上命軍機大臣傳諭和春福濟曰逆匪占踞廬州經我

兵焚燬賊營四處大挫兇鋒惟城外賊營不止此數
必須乘銳圍攻爲一鼓殲除之計至六安逆匪與廬
郡之賊互爲犄角雖經該署知州茅念劬奮力截擊
斃賊多名而州城尙未克復逆匪仍可往來自如該
提督等奏稱必須先復六安則廬州克復較易自係
最要機宜著和春等一面迅攻廬州一面知照秦定
三督飭茅念劬剋期收復六安則廬城賊勢益孤勦

辦更可得手

同日英桂奏言臣聞南陽鎮總兵柏山聲名平常上年六月間逆匪竄擾許州該總兵帶兵已至城外之八里橋探知賊匪圍攻州城輒退兵二十餘里之臨溝河駐紮以致賊匪由臨潁南竄連陷數城秋閒固始縣擒匪滋事前撫臣陸應穀咨令督兵往剿詎到彼月餘安居城內並

未親駐營盤臣當以軍務需人望其愧奮改悔
乃自皖省六安告警固始偏近逆氛經臣飛咨
督兵堵剿該總兵竟緩程行走復繞道信陽及
臣催提始行就道並未深入賊巢本年奉

旨飭赴楚北援剿該總兵始則欺誑台湧由南陽桐唐
一帶截擊繼則以所帶之兵僅二百七十名不
能進剿改駐新野防堵蓄心取巧畏葸無能相

應請

旨將柏山卽行革職並請毋庸留營效力以爲巧飾欺
朦者戒奏入

上諭內閣曰柏山係專閫大員當此軍務喫緊之際應
如何力圖報效乃一味畏葸任性巧詐若不嚴加懲
辦何以挽積習而肅戎行英桂奏請革職不足蔽辜
柏山著卽革職發往新疆效力贖罪並著卽行起解

不准逗留

英桂又奏言臣接奉

諭旨令籌全豫防守事宜查信陽近接應山前因隨州之賊回竄孟畝店距信陽黃土關僅二十餘里急須嚴防北竄楊需卽帶兵前往並飛催桂明由黃土關迎剿其平靖武勝等關亦經南汝光道余炳燾督兵扼守昨據該道稟報探得孟畝

店賊匪約二千餘人於五月初四日由黃土平靖兩關外繞越而過因聞各關防守甚嚴避道行走初五日行抵應山縣城外經我兵迎擊斃賊甚衆該逆分路逃散現在台湧與舒倫保屢次勦辦得手正宜乘此聲勢次第進攻收復漢陽迅解武昌之圍力據長江上游以爲大兵南下合勦之計臣復飛催桂明迅督官兵緊追前

進冀爲台湧舒倫保後路策應並飛咨楊需就
近督催仍於豫境密籌堵遏如果該逆被勦窮
蹙復竄隨州則須酌分兵勇移堵桐唐並將南
陽一帶與湖北荆襄棗隨接壤各處扼要布置
以固豫省藩籬北路連鎮之賊分竄高唐情急
南奔豫省衛輝考城及開封蘭儀等縣皆與山
東接壤均應豫爲布置沿河各要隘臣已會同

副都御史臣王履謙河臣長臻派委委員在直隸山東各處偵探晝夜梭巡

同日崇恩奏言逆匪困踞高唐勢極窮蹙官軍攻城時見城上賊衆多半薙去長髮身穿藍白布衣意在溷跡潛逃又據獲賊供稱賊衆晝夜趕製號衣意欲扮作綠營官兵零星逃竄臣立卽通飭各地方文武及各路派防處所遇新薙

頭髮及身穿新號衣者細加盤詰勿稍疏虞均
奏入報

聞

二十五日
癸亥和春福濟奏言據署六安州知州

茅念劬稟稱五月十三日探得州城賊防稍懈
卽挑選壯勇二百餘人密約城內百姓爲內應
令各紳勇分路前進並派勇堵遏要路十五日

茅念劬督率紳董練勇萬餘人分三路進攻賊
衆出拒各勇槍礮齊施斃賊無數將城外賊營
平毀次日各勇併力登城砍殺守陴賊匪開東
門一擁而入該匪不能抵禦由南門逃竄復經
茅念劬等追擊將餘匪悉數殲除立將城池克
復六安地本繁難久遭蹂躪一時簡調乏人可
否仰懇

天恩卽以署知州布政司經歷茅念劬升補六安州知
州辦理善後事宜練首舉人李元華免補知縣
本班以知州儘先選用先換頂戴在籍候選仍
辦團練以資熟手奏入

命軍機大臣傳諭和春福濟曰此次六安鄉團協助
官兵奮勇殺賊立將州城克復洵屬深明大義殊堪
嘉尙亦由該知州素得民心故能人人用命和春福

濟等惟當加以策勵堅其固守之心藉可協同搜剿
目下廬州大股經官兵屢剿獲勝逆膽已寒著和春
等迅督將士乘銳進攻廬城及早克復仍知會秦定
三移兵南向並酌帶劉玉豹忠泰所領各兵進徧南
路賊巢探賊所向分投剿辦若能乘勢將舒桐一帶
逆眾掃數廓清則廬州安慶之賊自可一鼓蕩平六
安收復以後是否仍須兵力著該提督等相機籌辦

茅念劬始終可靠卽責成該知州辦理一切事宜
和春福濟仍通籌南北全局勿令該逆乘虛北竄

諭內閣曰此次克復六安州城該署知州茅念劬督
率練勇奮勉出力該練勇等同仇敵愾忠義可嘉均
應優加獎勵所有六安州知州員缺卽著茅念劬補
授練首舉人李元華著免補知縣以知州儘先升用
先換頂戴並在籍候選仍辦團練其餘出力紳民及

陣亡練勇著和春等分別查明請獎並咨部議卹

二十六日

甲子

勝保奏言高唐踞逆自五月十五

日後將三門緊閉用土木掩塞暗挖礮眼拒守
有絕城出修濠柵者疊經官兵擊退連日大雨
未能進攻現已於城之東北築成礮臺安設大
礮晝夜向城內轟擊二十一日出隊進攻善祿
攻其東面崇恩攻其西面德勒克色楞攻其南

面臣親督各步隊由北而東復繞至南面往來
催督兵勇負梯越濠直抵城下甫欲登城城上
槍礮如雨兵勇冒死前進攀援登城城上賊衆
死拒我兵連傷十餘人僅奪其城上黃旗一面
殺斃賊匪數人並焚燬西門甕城前木柵臣等
復於次日丑刻乘夜進攻川楚勇已越濠樹梯
又被槍礮傷二十餘人其東面因兵勇力攻逆

衆情急由東面地洞撲出二百餘人經我兵擊斃數十人賊卽敗退我兵追至東門濠邊賊由地洞逸去復由南門東南角地洞突出百餘人來抄我兵之後臣卽飛馳截殺擊斃十餘賊賊伏濠中施放擡槍馬隊勢難越濠臣復令兵勇一齊擁上該逆不敢踞濠退入地洞我兵復用火彈向其焚燒賊不敢出其南關街內尙有賊

數十人被我兵殲斃並將南門甕城賊柵及附近南門房間一律焚燬連日進攻雖已逼近城下終未得手臣現仿古人呂公車製造攻具變通古法斟酌時宜此閒地勢當可得用奏入

上諭曰地洞木寨何成之若是之易呂公車固可酌改適用然我有以制之彼必有以應之徒勞無益藉口耽延終無了期已屢次登城奪獲賊旗豈有不能攻

進之理明係接應遲誤各不相顧培成那敷德著查
明叅奏如有心觀望卽在軍營正法

上命軍機大臣傳諭勝保曰高唐葭爾州城逆匪不過
千餘何以一經踞守進攻卽如此之難據奏西面兵
勇業已登城且經奪獲賊旗如果迅速接應何難立
時攻入培成那敷德紮營正在西面並不揮兵繼進
是何居心且賊在連鎮卽由培成等營盤撲出追竄

踞高唐又屢向培成等列隊處所奔突是培成等始
終不能得力實堪痛恨著卽查明叅奏該大臣務當
嚴申軍律萬不准稍事姑息所稱製造呂公車尙須
數日而我兵又無護身器具似此遷延何日始能了
事崇恩昨奏城中逆匪多半薙髮暗造青布號衣欲
假冒綠營官兵潛蹤竄逸儻我兵攻具甫成而賊已
潛遁僅賸空城我兵卽欲追襲亦須處處分撥愈難

兼顧該大臣又何以處之至西南兩門官兵旣已偏近甕城焚燬木柵是其地洞通透之處已無遮護或設法塞毀或用火藥填轟均可相機速辦

同日成都將軍樂斌四川總督裕瑞四川提督萬福奏言湖北宜昌失守在在與川疆接壤省垣根本重地臣裕瑞未便遠出應由臣萬福親赴萬縣夔巫一帶扼要駐紮各營存兵無多實

難再行多調現於省標各營及峨邊營酌派精
兵六百七十名隨臣萬福同往與先後派防官
兵堵剿兼施相機辦理惟各處要隘甚多兵力
極形單薄前此續派赴楚兵練一千一百名尙
未出境應請

旨將此項官兵截留在川俾壯軍威臣萬福現於五月
十二日自省帶印起程奏入

上命軍機大臣傳諭樂斌裕璫萬福曰楚北賊氛方熾雖分竄宜昌一股全行南遁惟仍擾宜都枝江縣境僞逆衆乘虛回竄或伺隙西奔川省邊防關繫最要萬福現帶兵勇前赴萬縣夔巫一帶扼紮卽著該提督隨時確探賊情督率防兵分守要隘實力堵截儘須出境迎剿亦卽相機而行斷不准以防堵爲名致成株守如有緊要情形卽著萬福專摺馳奏前派赴

楚之兵練一千餘名現尙未出川境著准其截留在
川一併歸萬福管帶調遣至駐紮巴東利川之松潘
建昌兩鎮官兵由雙保福忻分帶駐守節經嚴諭飭
催帶赴荊州宜昌協同防剿迄今數月之久仍復遷
延不進該總兵等畏葸無能深堪痛恨署松潘鎮總
兵副將雙保著革職暫行留任建昌鎮總兵福忻著
先行摘去頂戴均仍責令上緊帶兵起程前赴官文

軍營聽候調撥儘敢再事稽延卽行從嚴叅辦按律治罪

二十七日

乙丑

台湧奏言查宜昌荆門監利等城

均已克復西路情形較鬆且添有四川官兵二千名助剿當亦足敷調遣桂明已抵應山舒倫保所調後起官兵尙未出豫入楚若早日趕到則聲勢較壯可乘勢南攻惟孝感應城兩路賊

蹤飄忽而湖河港汊處處閒隔甚爲礙手臣現
擬分兵兩路由孝感之楊店應城之長江準節
節設法隨勦隨進以期力攻漢陽漢口後路並
密派得力兵勇前往作爲內應一俟桂明舒倫
保來至德安卽面籌辦理奏入

上命軍機大臣傳諭台湧舒倫保曰逆匪盤踞漢陽漢
口大江南北形勢阻隔亟須設法進攻以爲武昌援

應該督現擬分兵兩路隨勦隨進直達漢陽漢口著
卽與桂明舒倫保督率將弁分路進兵並著舒倫保
飛催所調後起官兵趕緊由豫入楚以資攻勦仍須
嚴防黃州陸路賊匪乘虛北竄大兵勦辦得手能與
武昌聲息相通卽知會青麀速行派兵爲兩路夾攻
之計毋稍遷延前據青麀奏孝感練勇得力飭令該
縣李殿華抽撥二三千名由楊店驛進勦並據官文

等奏飭令參將佟攀梅會同旗營官兵駐守丫角驛扼守勦辦俟土匪辦竣卽令赴援武昌該督等卽可就近飭催會合夾擊

十八日 丙寅 僧格林沁西凌阿托明阿奏言臣

等現因逆匪防範甚嚴召募熟習路徑之人擬於夜間進攻並將西岸長濠收近一千餘丈令慶祺帶步隊二千五百名在南面紮營令侍衛

都興阿帶馬隊一千名移紮西岸惟官兵偏近
賊壘不能選擇地勢是以各營盤皆紮附近河
干低窪之處設運河水勢漲發該逆掘隄放水
甚爲可虞臣等飛咨山東撫臣委員於上游設
法宜洩二十五日該逆撲出多名臣等親督各
營官兵乘機勦洗殄斃三四十名該逆敗退回
巢我兵均尙奮勇惟副都統明慶接應遲緩應

請

旨將該副都統明慶革職留營以觀後效二十六日臣等派官兵平墊濠溝該逆大股出巢臣等豫派營總格綳額帶馬隊數十名在樹林設伏時該逆離巢已遠格綳額乘勢擊殺斃賊四五十名該逆馬步數百餘人向格綳額攻撲該員策馬當先馬隊數十名隨後繼進將該逆擊回副都

統達洪阿督帶官兵復抄該逆之後斃賊五六
十名該逆仍前抗拒經我兵放礮轟斃無數共
計兩日斃賊約二三百名臣等仍激勵將士剋
日進攻黑龍江總管格綱額連日接仗身先士
卒二十六日之戰該員以數十騎破賊數百人
斬殺多名實屬奮勇可嘉應請

旨將尤爲出力員弁量加鼓勵奏入

上命軍機大臣傳諭僧格林沁曰據僧格林沁等奏稱各情是我兵業經逼近賊壘若能四面合圍聚而殲旃不使一名漏網固爲上策但該逆負隅死守是其慣技我兵旣不能直搗賊巢而窆築長濠又未必能處處周密徒延時日迄無成功且我兵亦被長濠所阻進退不能自由前車可鑒設該逆乘閒竄逸我兵又成尾追之勢似此曠日持久勦辦何能藏事此時

逆匪被圍日久意在狂奔不若擇要設伏督兵進剿
盡驅該逆出巢奮力截擊較之合圍坐守更可得力
該大臣務當悉心籌畫亟思剿除之策斷不可再事
遷延各營屯紮河干低窪之處賊掘運河固屬可慮
現在夏令雨水較多泥淖之中我兵攻剿豈能得力
該大臣仍當相度機宜妥爲布置

上諭內閣曰逆匪竄踞連鎮經僧格林沁等親督官兵

進剿黑龍江總管格綳額身先士卒奮勇可嘉著賞
給富隆阿巴圖魯名號黑龍江委防禦旺齊克扎布
等均著賞戴藍翎接應遲緩之副都統明慶著卽革
職仍留軍營差遣

同日青麀奏言五月初十日漢口逆船忽有四
百餘隻竄赴下游已革總兵楊昌泗隨往密探
該逆已由礮窩登岸砌築土城望屋蓋欲占我

要隘絕我米糧楊昌泗僅帶兵三百名不敷攻
勦臣因派都司周祿等各帶兵勇數百名交楊
昌泗統帶都統魁玉妥協領安貴等帶領滿兵
三百名星夜馳往臣另派副將書紳等帶領標
兵一千名續往接應楊昌泗等一擁直前當將
其土城轟倒該逆千餘人出敵槍礮如雨周祿
等伏兵齊起將其頭座賊營踏毀該逆齊出抵

拒適書紳等趕到我軍勇氣倍增復將賊營四處一律平毀並焚其望屋該逆勢不能支奔竄回船我軍追至江邊四路勦捕殺賊一千餘名生擒五十餘名焚燬賊船七十餘隻奪獲二十餘隻磯窩一帶業已肅清又該逆先於初九日出船三百餘隻在江游弋旋分撲塘角鮎魚套兩處經副將舒寬等督兵擊退初十日漢口復

出大小船一百五六十隻直撲塘角鸛鵒洲出
船一百餘隻直撲鮎魚套維時西風正厲帆檣
如矢飛駛而來侯鳳岐等疊開槍礮該逆仍冒
死前進適值楊昌泗由磯窩折回飛調礮船應
援臣在城樓督開大礮擊沈塘角逆船二十餘
隻鮎魚套逆船九隻該逆乘夜逃竄其武昌南
門外石嘴地方逆匪潛築土城亦經我兵拆毀

餘匪逃散此次尤爲出力之協領安貴等應行
開列仰懇

天恩給予獎勵奏入

上命軍機大臣傳諭青麐曰此次漢口賊船竄擾磯窩
並分撲塘角鮎魚套青麐飭令楊昌泗等帶領兵勇
合力擊退勦辦尙爲得手刻下宜昌荆門監利均已
先後收復舒倫保桂明督兵已入楚境昨據台湧奏

報孝感應城兩路水次尙有賊蹤該處湖河港汊甚多該督已擬分兵進剿以期掃蕩漢陽漢口青麇卽當移得勝之師迅將沿江一帶逆匪殄滅與台湧等會合夾擊不得因武昌可保無虞專務株守且石嘴緊對漢陽沌口磯窩地皆濱江仍恐該逆再圖分撲欲保省垣當以肅清江漢爲要該撫務當統籌全局與台湧等同心合力不准各存意見

上諭內閣曰此次逆賊欲占磯窩要隘並於塘角等處
駛船分撲均經官兵擊敗大挫賊鋒所有打仗出力
之委協領安貴著賞給霍斐延巴圖魯名號並賞戴
花翎遊擊玉山著賞給阿穆爾翰巴圖魯名號賞戴
花翎並著免補本班以參將用都司周祿著賞給僉
勇巴圖魯名號從九品李保邦著俟補府經歷縣丞
後以應升之缺升用

青麀又奏言已革總兵楊昌泗奉

旨發往軍臺臣等以統帶乏人奏請暫留軍營旋因省城東門外之長春觀爲適中最要之區當飭前往駐紮並將城外兵勇悉歸統帶該革員不辭勞瘁周城十餘里無日不晝夜梭巡數月以來接仗數十次匹馬橫刀身先士卒所向有功可否仰懇

集賢堂卷之三
天恩免其發往軍臺仍帶革職處分留於湖北軍營效力奏入

上從之

二十九日
丁卯向榮奏言臣接奉

諭旨令俟紅單船入江節節堵截使賊不至肆行無忌
現在紅單船將次到江自宜豫籌扼勦臣擬分
提二十隻並配艇船數隻由臣營挑派得力弁

兵前往協同管駕分籌扼剿以清江路伏查下
游金山土橋與瓜州各江口皆有險要可扼惟
距臣軍較遠應由琦善就近布置與下駐焦山
之師船悉歸調度一俟瓜州克復再次第上駛
扼攻至金陵上游兔兒磯與臣營聲勢緊接固
宜駐泊師船惟上游太平蕪湖兩處河口係通
東壩與徽甯之路及江北之裕溪口鍼魚嘴一

帶均爲最要關鍵臣愚以爲太平蕪湖之間宜
有水上一軍堵剿更形嚴密但戰船扼截之處
非有陸軍犄角屯紮勢難駐泊擬由臣營抽撥
官兵並移出東壩之兵會合水軍聯絡分駐則
不特可斷上下賊船援應並可堵其旁竄分擾
之路但臣軍分撥日少所有前調福建官兵日
久未到應請

旨飭下該督催令迅速前來以資調遣至安慶濱江一帶仍當知照和春福濟相機設伏以圖暗毀賊船節節扼勦而上庶大江漸得疏通兩湖江西逆蹤自斷金陵亦易奏效奏入

上諭曰專待鄰省之兵緩不濟急且可藉口耽延著速就現有之兵籌勦

上命軍機大臣傳諭王懿德曰金陵大營兵數分撥日

少福建漸就肅清無需多兵留守著王懿德迅將前調之漳州各營精兵二千名卽日派委得力大員管帶兼程馳赴向榮軍營毋少遲延

向榮又奏言據探和州駛回賊船停泊觀音門外可以潛往火攻並查金川門外賊營二座該逆防備頗疏亟宜出其不意潛夜往襲臣派翼長福興等帶廣東兵勇專襲金川門而以廣西

之勇往焚觀音門賊船復令已革提督鄧紹良等帶領湖南川東官兵往襲神策門另派川兵捷勇伏於鍾山左右來往策應防勦太平門而以總兵德安督領貴州廣西兵直擣朝陽門牽制賊衆三更後廣東兵勇首先馳至金川門外越過重濠拔取竹簽乘賊不覺大呼撲入賊營立斬賊匪一百三十餘人將前營踏毀餘賊竄

遁後面賊營卽時開礮迎拒各兵勇奮不顧身
擁殺上前賊營焚燒匪衆潰散維時廣西各勇
已到觀音門遙見賊船連泊對面之七里洲參
將蔡應龍等督令各勇潛上划船乘風射放火
箭延燒賊船多隻該逆各向上游逃駛統計襲
破賊營二座擊毀賊船五十餘隻斃匪三四百
名容再相機進剿奏入報

聞

欽定剿平粵匪方略卷九十六 甲寅年

六月初一日

戊辰

陳啟邁奏言據帶兵各員稟稱

逆匪二千餘名由九江竄入德安建昌縣境勾結土匪大肆焚搶該文武等集團截擊詎意逆匪分股竄入建昌縣城該文武等聞變折回救援不及適值遊擊富克金泰等統帶兵勇行抵建昌縣地方該縣知縣景瑞隨同進剿直薄城

下三面夾攻該逆堅守抗拒我兵奮力攻擊逆勢不支紛紛逃竄各員弁沿途追殺斃匪四百餘名生擒四十餘名餘匪回竄德安署德安縣知縣劉希洛等因衆寡懸殊以致敗績該縣遂退至西鄉堵截武甯股匪以杜糾合署武甯縣王宇英等協守縣城連日被賊攻撲均經竭力抵禦不意土匪乘勢由北門撲入縣城該縣回

救不及臣已嚴檄遊擊鐵林等馳赴武甯會督
進剿並令已革總兵趙如勝酌撥兵勇由義甯
就近策應一面札飭遊擊富克金泰等卽移建
昌得勝之師進薄德安復添派兵勇馳往協剿
並令九江鎮總兵佛隆速集弁兵由九江躡賊
之後相機夾擊務期速殄逆氛該地方官防禦
不力咎無可辭相應請

旨將知縣劉希洛等革職九江鎮總兵佛隆不能力遏
寇氛以至蔓延數縣應請一併革職臣調度無
方並請

飭部議處奏入

上命軍機大臣傳諭陳啟邁曰此次土匪乘勢撲入武
甯縣城建昌雖經退出餘匪仍聚德安該撫現飭遊
擊鐵林等會勦武甯一股並添派兵勇令遊擊富克

金泰移建昌之師進攻德安務卽嚴飭各該員弁迅速相機前進分投夾攻九江爲該逆來路所稱速集弁兵由彼處躡賊之後自是要著果能扼守要口絕其來蹤截勦自易爲力義甯一州緊連楚境卽爲武甯前路前派副將羅玉斌所帶官兵能否扼要堵截自應督飭各員與已革總兵趙如勝合力援勦不得任令偷安巧避至各處土匪乘機竊發並著陳啟邁

飭屬認真搜捕佛隆現已革職新授九江鎮總兵居
隆阿到任需時儘委署無人或暫令該革員隨同剿
辦亦無不可但不准率請留營效力爲事後開脫地
步

上諭內閣曰賊匪竄至江西之德安等縣地方該署知
縣劉希洛等防禦不力實有應得之咎署德安縣事
卽用知縣劉希洛建昌縣知縣景瑞署武甯縣事通

判王宇英均著革職仍責令帶罪自效九江鎮總兵
佛隆不能力遏寇氛致賊匪蔓延數縣實屬辜恩溺
職佛隆著卽革職陳啟邁疏於防範著交部議處

初二日己琦善奏言查瓜州濱江阻險直對京

口密邇金陵賊舟滿江無從杜其援應臣奉

命節制水師滿擬藉資羣力殄此巨寇無如水師積習
相沿江南廢弛尤甚臣嚴檄戰船上駛屢次遲

回罔應五月十九日督令陸路兩岸官兵同時
攻勦西路賊營出數百人拒戰經官兵斃賊匪
百餘名是日水師各船仍未上駛二十二日陸
路各營官兵適由三汊河先抵瓜州東岸出賊
一二百人經副將鞠殿華等擊傷多名該匪遁
入土城堅守不出遊擊馬永泰等由西岸進攻
開放銅礮斃賊二百餘名忽有賊船由鎮江來

援我兵乘勢焚燒賊船二隻其時土城內出賊
接應又經官兵擊斃多名餘匪仍遁入土城現
在四鎮艇船俱寄泊瓜州上游未及東下所有
艇船接仗情形尙未據該鎮等稟報儻能持久
雖鎮江之賊不能扼住而金陵接濟卽可斷絕
臣惟有竭力進攻早圖克復

琦善又奏言臣據報水師各船上駛行過南岸

鎮江甘露寺一帶賊營開放大礮有雇募之夾
板船一隻被賊礮引燃延燒火藥船上之人多
有傷亡現該鎮等均已督帶戰船駛至上游或
可藉其堵截金陵接應俾陸軍得以痛剿惟臣
親至水營察看浙師各船駕駛不能得力各色
船隻滿江毫無紀律安能制勝臣膺此重任事
事掣肘仰懇

聖恩鑒臣心力交瘁非敢藉詞推諉奏入

上命軍機大臣傳諭琦善曰連日官兵攻剿瓜州東西兩岸賊匪雖擊斃多名仍未能克復豈得謂大挫賊鋒況夾板船爲賊礮轟燒人多傷亡是水師已不免挫折雖陸路疊有斬擒亦屬得不償失現在艇船俱寄瓜州上游究竟如何接仗據稱浙師各船駕駛不能得力且毫無紀律水師疲玩積習最堪痛恨現在

既歸該大臣節制惟當激勵將弁力圖振作督飭各船駛赴上游力扼鎮江金陵賊匪接濟之路一面飛催紅單各船剋期駛入長江與向榮合力攻剿務當督飭各軍迅圖克復毋再遷延干咎

同日舒倫保桂明奏言臣桂明統帶陝甘官兵馳抵應山縣面晤臣舒倫保探知賊匪從南路竄出至孝感縣屬之三汊港花園小河溪等處

分股滋擾查小河溪距武勝各關僅百餘里恐一路北竄一路分抄則南路官兵首尾不能兼顧恐有腹背受敵之虞臣等熟商先撥兵五百名在距小河溪七十里之廣水鎮屯紮臣等卽於武勝各關擇要嚴守俟賊蹤竄近卽行迎頭兜擊庶可稍遏兇鋒

同日英桂奏言據探由張店退回麻城股匪在

該縣築立土城並分竄梅家樓地方滋擾現在
麻城之宋埠上中驛等處均有賊數千名臣查
光山與麻城交界之董范店虎頭關等處逼近
賊氛僅有都司楊鼎金等帶領兵勇分駐要口
實形單薄府尹楊需咨商添調兵勇臣已於省
城酌派壯勇三百名委弁管帶馳赴光山並飛
飭參將伊里綱阿帶勇五百名由信陽馳往統

歸楊需調遣相機截勦其歸德陳州一帶仍當
隨時策應如果皖境邊防緊急臣當馳往督辦
英桂又奏言據探湖北德安隨州棗陽襄陽地
方俱無賊匪其德安隨州竄出之匪俱歸漢口
麻城逆匪竄至商城邊境西界嶺馮店等處盤
踞查商城距省遙遠若由省撥兵前往恐緩不
濟急當飭派防固始之參將慶瑞帶兵二百餘

名並副將慶德等帶兵四百名練勇八百名星馳赴商交楊需調遣徑赴光州督勦儻賊勢猖獗臣卽酌帶兵勇馳赴應援均奏入

上命軍機大臣傳諭台湧舒倫保桂明英桂曰湖北逆賊四處滋擾該將軍等卽於武勝各關擇要防勦此仍係前數日情形現在賊踞漢陽一帶該督等當統籌全局和衷共濟總以隨勦隨進援應武昌爲要若

株守武勝各關豈不貽誤事機現在楊需帶兵已馳往豫楚交界防堵舒倫保桂明白應迅速進兵並催後路續到之兵趕緊前進與台湧相機進剿不得稍涉遲誤前由張店退回麻城股匪在梅家樓地方滋擾現在麻城並宋埠上中驛等處均有賊匪數千名著英桂飛咨楊需由信陽馳至光州督剿並著台湧等懷遵前旨嚴防該逆乘虛北竄仍隨時知照楊需

加意嚴防

初三日

庚午

僧格林沁西凌阿托明阿奏言連鎮

踞逆仍前死拒臣等列隊進攻該逆在賊壘以

外復行空濠達洪阿催督兵勇奮力攻撲擊斃

甚多詎料左膀忽受槍傷勉強支持整隊而回

臣等當飭各營官兵將該逆擊退景州知州李

麟遇選帶壯勇來營協剿臣卽飭隨同進剿乃

該逆狡悍異常堅壁不出李麟遇督帶壯勇奮力越過賊濠偏至牆邊我兵相繼而進該逆槍礮如雨不能得手斃賊雖衆而勇丁傷亡亦多臣等惟有竭力進攻以期速奏蕩平奏入

上命軍機大臣傳諭僧格林沁西凌阿托明阿曰該大臣統領全軍勦辦此股逆匪惟恃它濠坐困於攻勦事宜毫無把握賊巢何日可以掃除高唐竄匪尙未

殄滅設此股負嶠久拒牽掣我師或紛竄蔓延肆行
勾結其患曷可勝言況皖楚賊匪難保不復圖北竄
畿輔一日不清大兵卽不能南下朕宵旰焦勞難安
寢饋該大臣身受重恩亦當爲朕分憂也副都統松
玉日久未見打仗現在何處紮營是否得力著查明
具奏

僧格林沁又奏言副都統烏凌額前在阜城大

營頭受槍傷力疾隨營至東光縣調理復患重
疾出缺歿於王事深堪悼惜理合奏

閩奏八

上諭內閣曰墨爾根副都統烏凌額在阜城軍營頭受
槍傷力疾隨營因病身故殊堪憫惻著照軍營病故
例賜卹

初五日 壬申 官文貴陞奏言荆郡爲七省通衢前

次面面皆爲賊擾宜昌府潰敗賊匪由西南下
竄華容石首監利潛江沔陽等州縣均爲賊匪
盤踞而襄河道路復梗臣等疊經分投勦辦刻
下漸就肅清宜昌潰敗之賊由臣貴陞督率遊
擊王國才等渡江追剿至公安縣鼃空地地方遇
賊千餘名我兵開放槍礮擊斃數百名餘匪追
殺殆盡其水路之賊飛駛遠颺我兵奪獲賊船

二隻殺賊數十名餘俱四散仍留兵設卡虎渡
口一帶以防回竄是上游江面已清楚蜀要道
不至梗塞監利縣城經守備福興等克復而所
轄之下車灣朱家河等處賊巢復經守備宗維
清等帶兵勦辦將賊卡概行拆毀餘匪逃入沔
陽州屬境是監利賊已敗遁可無上竄之虞復
令鹽運司經歷吳振鏞等管帶兵勇折回監利

會合守備宗維清等由洪湖沔陽新隄一路相機隨進隨勦赴省應援惟沔陽州城及所屬之府場洪湖隄猶爲賊踞且省城待援甚切必應通盤籌辦隨添派佐領錫齡阿等統帶官兵三百名會合參將佟攀梅等進攻府場以期撲滅淨盡其襄河一帶現有四川松建二鎮漢屯官兵二千餘名先後抵荆已飭令原帶之總兵雙

保福斫剋日起程由丫角驛前進收復潛江後
再渡襄河由天門仙桃鎮岳家口麥芒嘴行走
遇賊卽勦直趨漢川漢陽過江到省聽候調派
至石首華容等縣經吳振鏞等統帶兵勇先後
克復刻下荊州所屬七邑安靜如常臣等酌撤
防兵以節糜費專派官兵一百餘員名在沿隄
一帶查拏奸細保護江隄以期有備無患奏入

上是之

初七日

甲戌

青麀奏言刻下省垣危急全望援兵

早到腹背夾攻庶可藉解省嚴聞督臣台湧前

往德安駐紮決意不來省會西安將軍舒倫保

固原提督桂明於五月初十前後進紮應山均

無拔營來省之信鸚鵡洲逆匪屢來攻撲晝夜

不休且聞上游湖南之匪下游江皖之匪因被

勦敗亦續來漢鎮省中前雖處處受困而東門
尙有路可通今該逆復於距省上六十里之金
口下七十餘里之白湖鎮正東六十里之豹子
澮分布屯踞多則七八千人少亦三四千人直
欲四面偪圍省城情形日危一日乃督臣於應
山賊退後遷延月餘坐視不救疊經臣函咨隻
字不覆昨據探報德安雲夢黃陂一帶俱已肅

清該督之意自以嚴防北竄爲詞不知德安勢
緩省垣勢急該督身任兼圻何竟將根本重地
漠不相關惟有懇

恩飭催舒倫保桂明等星夜赴省速救危城奏入

上命軍機大臣傳諭青麀曰逆匪屢敢窺伺武昌皆恃
漢鎮爲老巢台湧等兵旣未能直達漢江青麀亦專
守省垣致令賊衆得由鸚鵡洲一帶屢圖攻撲前有

旨令舒倫保桂明由應山遄發諒該將軍等卽可與
台湧先後進兵應援武昌本日復降旨催令督兵前
進惟賊蹤靡定江北之兵利在速剿須嚴防賊匪北
竄武昌勢固危急亦須兼籌全局豈可專恃外援談
罪他人青麀仍當激勵將士以勦爲守或扼截該逆
登岸之路或於沿江上下時出奇兵明攻暗擊不可
稍有疏懈青麀與台湧均職任疆圻並當和衷籌辦

不得各懷意見致誤軍情

上又命軍機大臣傳諭台湧曰前於五月初八日卽據
台湧奏稱馳赴德安相機進攻漢陽自應與舒倫保
桂明趕緊督兵前進迅圖攻勦何以又隔多日未見
將攻賊情形馳奏此時舒倫保桂明先後趕到雲夢
應山等處亦漸次肅清正當嚴飭官兵會合前進急
攻漢陽漢口以爲武昌應援刻下省城危急儻稍有

疏虞該督貽誤之罪豈能末減著卽與舒倫保桂明
迅速進兵攻克漢陽爲救援武昌之計台湧與舒倫
保桂明係共辦一事嗣後務與會銜奏事總期同心
協力肅清江漢儻仍藉詞延宕致有疏失朕惟執法
從事決不姑寬

同日和春福濟奏言自逆匪竄踞廬州府城疊
經官軍攻勦勢極窮蹙臣等派令江忠濬等帶

領兵勇三千名赴得勝門一帶紮營進逼賊巢以便合圍五月十七日後復派兵分攻各門四面圍剿臣和春居中調度臣福濟在後接應同時進攻該逆於南門突出賊匪二三千人分路來撲鄭魁士等分投迎剿先後擊斃騎馬黃衣賊二名餘賊敗退入城閉門不出得勝門亦突出賊匪一二千名經江忠濬等督勇攻剿斃賊

無數該逆退走音德布等由水西門趕至合力
追擊逆匪奔敗入城約斃賊匪二三百名連日
更番環攻逆匪堅伏如故二十二日逆匪由南
門突出二千餘人鄭魁士等揮兵迎擊開放大
礮逆匪紛紛倒地並擊斃執令騎馬賊一名餘
賊敗退入城同時得勝門外賊營並大西門各
突出賊匪七八百人經江忠濬等迎擊斃賊二

百餘名二十三、四等日飭令兵勇更番環擊逆匪突出千餘人迎拒兵勇擊斃無算二十五日五鼓鄭魁士等潛赴南門遇匪千餘名往南行走正追逐間南門又突出賊匪二三千人適嵩瑞等趕至一齊追殺逆匪敗退入城仍前堅伏先後約斃賊匪五六百名生擒十一名收隊時北門復突出賊匪二千餘人經玉崑等飭令官

兵擊斃無數該逆退回城內是日酉刻得勝門
有逆匪坐轎帶賊數百人出城似欲窺探廣楚
各勇營盤經江忠濬等督隊攻擊斃賊數十名
臣等卽傳令各營連日將大礮運至城邊晝夜
轟擊時聞人聲鼎沸其爲驚怯無疑祇以城大
而堅急切未能得手臣等惟有設法攻取迅圖
克復

和春福濟又奏言據署太平府知府李三捷等稟稱四月十八日晚間有賊船多隻泊城外金柱關口上岸燒燬民房當督兵勇堵剿賊卽乘船逃去城內驚惶居民星散該署守等正在設備該逆於二十八日復乘船駛進金柱關經署當塗縣知縣王乃晉等帶兵迎擊槍斃賊目數人該逆另股由大信關河口登岸直撲南門該

署守等集團環攻兵勇勢不能支紛紛逃走學
臣孫銘恩於賊匪入城時身穿公服在大堂罵
賊被賊綑縛該家丁等亦被戮傷逃避臣等查
太平府城失守雖旋即克復而該署守等果能
先事籌防何致遽被闖入相應請

旨將署太平府知府同知李三捷署當塗縣知縣府經
厯王乃晉一併先行革職仍留署任學臣孫銘

恩究係如何殉難客 臣等查明請卹

和春福濟又奏言 臣等查廬州北路官兵節次
剿賊尙屬奮勇惟西路官兵數月以來大捷甚
少總緣兵力輒弱帶兵大員珠克登等駕馭不
得其宜又巢湖一帶爲該逆往來之路前派兵
勇二千餘名委副都統忠泰帶往剿辦乃時逾
兩旬所報接仗獲勝情形諸多捏飾相應請

肅西甯鎮總兵珠克登陝安鎮總兵楊青鶴副
都統忠泰先行交部議處仍令督兵上緊攻剿
迅圖克復

和春福濟又奏言署壽春鎮總兵全玉貴前由
金陵來廬先後招募貴勇八百名派已革都司
吳錫光隨同管帶忽於五月十七日據吳錫光
面稟奉江西巡撫陳啟邁札飭帶勇前往臣等

以廬城攻勦喫緊不准前去詎該革員向各勇揚言江西餉足賞優以致軍心搖動將貴勇八百名全行帶走並帶去川勇數百名狡詐營私殊出情理之外相應請

飭令陳啟邁另揀妥員專司募帶各勇不得容留吳錫光以懲抗玩奏入

上命軍機大臣傳諭和春福濟曰我兵攻勦廬州逆匪

雖屢獲勝仗而郡城總未克復和春等辦理此股賊
匪已逾半年何尙毫無把握據奏賊衆千餘向南行
走恐竄出之賊尙不止此數儻該逆大股潛遁又擾
他處而以零星賊匪牽綴我師卽使收復空城於事
何益和春節制全軍福濟職任封疆均屬責無旁貸
總當設法進攻及早克復已革守備吳錫光竟敢造
言煽惑私行帶去各勇一千餘名和春於此等抗違

不法之員僅請飭令陳啟邁不得容留並未嚴叅治
罪無怪將士不能用命著和春迅將吳錫光截回廬
州卽在軍前正法總兵珠克登楊青鶴未能奮勇副
都統忠泰捏報勝仗僅請議處不足蔽辜已降旨將
該員等暫行革職帶罪自效和春係朕特派督兵大
員各路鎮將均歸統率何以珠克登等帶兵不能奮
勇直至接奉硃批後始行叅奏似此瞻徇何以統率

將士福濟自到軍營屢次奏報不過後路接應亦未見運籌決策擁兵糜餉日久無功豈謂朕不能執法從事耶失守太平府城之署知府同知李三捷署當塗縣知縣府經歷王乃晉著一併先行革職仍留署任學政孫銘恩殉難情形著查明具奏

上諭內閣曰賊踞廬州西路官兵數月以來大捷甚少並巢湖一帶派撥兵勇二千餘名勦辦亦屬遷延帶

兵各員統率無方亟宜嚴行懲辦甘肅西甯鎮總兵
珠克登陝西陝安鎮總兵楊青鶴副都統忠泰均著
暫行革職留營效力

初九日 丙子 青麇奏言查漢陽賊船直撲塘角經

我軍擊沈七隻轟斃逆匪三十餘名小河口復
出賊船一百三十餘隻上撲紅廟磯我軍擊沈
數隻連日該匪於小河口東門浦鷓鴣洲三處

各出船十餘隻在江游蕩經我軍先後擊退本月十九日逆船千餘隻由下游梁子湖竄至豹子解臣與已革總兵楊昌泗密派兵勇四千名分路往剿該逆聞風卽遁是日江上有逆船百餘隻由金口直下欲撲省垣經兵勇擊沈二十餘隻轟斃賊匪百餘名二十一日鸚鵡洲至三家店共出賊船數十隻分撲省城經平湖漢陽

兩門大礮擊沈十二隻次日小河口鸚鵡洲各
出賊船二百餘隻至塘角下十餘里登岸放火
楊昌泗親帶兵勇往剿共殺斃六十餘名溺斃
二三百名又江中逆船與我軍礮船鏖戰四時
之久擊沈逆船九隻並斃執旗賊目三名漢陽
門大礮將其對岸晴川閣礮臺轟倒壓斃逆匪
多名五月以來疊次獲勝情形雖大小不同而

聞

軍威尙未稍挫惟有激勵兵勇設法痛剿以期
力保危城奏入報

初十日

丁丑

勝保德勒克色楞善祿奏言

臣等所

造呂公車已成四架卽擬進攻適值連日大雨
高唐地本窪下泥淖數尺呂公車重笨難挽該
匪每夜潛出數百人來撲馬隊官兵迫我兵知

覺賊已突入營總托克通阿揮兵力戰身中矛
傷登時陣亡適臣接應之兵趕到將賊擊退回
巢該逆復潛出撲正北礮臺侍衛恭鈺猝不及
防手刃二賊身已受傷數處傷重陣亡賊遂暗
撲礮臺俱被我兵擊退回巢復於次夜撲南面
西面蒙古馬隊我兵開放連環槍礮將賊擊回
兵丁傷亡數十名六月初一日臣激勵兵勇四

面齊進崇恩攻其西面德勒克色楞善祿攻其西南東南兩面臣親督各官兵攻其東北西北正北面賊見我兵逼近於城上開放槍礮我軍進攻兩時之久陣亡三十餘名受傷一百六十餘名候補把總葛太平鼓勇向前甫欲登梯頭中槍傷登時陣亡楚勇黃開榜率衆登梯連傷十八人未能得手伏思攻城之時奮勇者自必

當先而傷亡實多殊覺可惜臣身爲統帥不能
迅除寇孽固難辭咎然不能愛惜人材以致徒
傷精銳負罪尤深初三初四等日復分兵攻東
西兩關用大礮轟擊城樓屋瓦俱飛因連日陰
雨收隊現存城之賊數不盈千然皆楚粵真賊
兇狡異常欲竄不能負隅死守一俟天氣晴明
三五日內仍極力設法攻取現飭購辦布袋數

千屆時囊土填濠以便呂公車過濠直抵城下
攻勦庶可得手吉林營總托克通阿等臨陣捐
軀應請

飭部照例議卹奏入

上命軍機大臣傳諭勝保德勒克色楞善祿曰逆匪每
夜潛出數百人暗撲我軍顯係被圍情急意欲乘間
免脫雖經我兵隨時擊退未容竄逸而該逆負隅死

守殄滅無期若再遷延時日坐待逆匪潰圍而出該大臣何顏對朕據稱現存之賊數不盈千我兵馬步三四千名似已足敷圍剿該逆雖兇狡異常何至屢次暗撲我兵毫無知覺竟至官弁陣亡多名該大臣所謂布置者亦不過徒託空言希圖塞責耳營中精銳之材固應愛惜亦豈得藉口耽延該大臣剿辦此股敗竄餘匪既未能克復孤城又於賊匪潛撲我營

不能先時設備似此曠日持久何時始克奏功著勝
保嚴飭各營將弁一面迅速進攻一面嚴防賊匪竄
逸之路務須相度地勢設伏以待斷不可任令賊匪
乘虛逃竄陣亡之吉林營總托克通阿二等侍衛恭
鈺候補把總葛太平均著交部照例議卹

同日琦善奏言據已革總兵葉常春等稟稱五
月二十二日水師各船上駛派令副將張攀龍

帶領快槳船爲頭隊葉常春等各駕師船爲二隊其餘廣局浙艇爲三隊相繼而進行至七號口以上見有鐵練橫亙江面張攀龍督率兵勇上前撈斫賊匪分路來攻兩岸賊隄連施大礮張攀龍率師奮擊葉常春等亦分隊進攻擊沈賊船數隻並將鐵練斫斷我師上駛陳世忠周士法帶領三隊師船由北固山甘露寺一帶攻

勦燒燬鎮江大馬頭瞭望屋一座南岸賊船十
餘隻亦經擊毀並擊毀北岸礮隄一座進偏金
山擊倒執紅旗賊匪多名適江風大作該總兵
等仍乘風進攻瓜州照準賊營連發巨礮於未
刻駛至瓜州以上江面等情臣於二十五日督
令陸路官兵進攻遊擊馬永泰等由西岸行至
四里鋪迤南賊匪突出千餘人分股來撲官兵

迎勦斃賊百餘復以銳卒直擣賊卡伏賊盡出
復經擊斃數十名當卽焚燒賊卡並焚其積聚
之米麥柴草毀其濠外之牆垣該逆復蠡擁前
來經守備梁愷等協力攻勦殲斃數十名餘匪
驚竄我兵追至江汊渡口未及過橋之賊全行
溺斃遊擊張維義等由高橋等處四路勦捕繞
至江邊焚燒供運賊糧之小村數處二十八日

有賊船三十餘隻自金陵駛下我軍俟其駛近
卽起碇圍攻奮勇進擊覆其大賊船六隻淹斃
賊匪無數並奪獲賊船十一隻餘船乘風下駛
陳世忠李德麟在上游尾追葉常春周士法在
下游迎擊又獲賊船六隻臣卽飭陸路官兵復
攻瓜州副將鞠殿華等由東路進攻該逆以數
千人拒戰經官兵擊退伏匿之賊又經官兵擊

斃數百名餘俱遁入土城惟江面遼闊各師船
須分泊南北岸方可截剿但恐船分單薄因飛
咨向榮飭南岸官兵於陸路接應並飛飭六合
儀徵等處一律防範與水師互爲應援此時專
盼粵中紅單船前來助剿一俟駛入長江卽當
嚴催上駛與艇船會剿瓜州賊援旣絕卽不難
迅圖克復奏入

上命軍機大臣傳諭琦善向榮曰賊船占踞江面必須
水師衝擊斷賊南北往來之路勦辦方能得手現在
水師連次獲勝可見各路師船如果調度有方尙屬
可用江面遼闊師船已提至瓜州以上分泊南北兩
岸惟有扼要布置自能以少勝多賊船屢次由金陵
下駛向榮株守城外卽不能迅復堅城亦當於陸路
接應扼賊分竄向榮與琦善共辦一事若先將瓜州

賊匪殄除卽可次第進剿會同克復鎮江金陵著該大臣等於南北兩岸嚴飭帶兵各員於陸路要隘併力截剿與水師互爲援應毋得稍失事機紅單船於四月杪已由廈門起碇何以至今未到卽著飛催迎提並查明統帶各員在何處耽延從嚴叅辦

上諭內閣曰此次揚州水陸各軍連日進剿屢獲勝仗而水師尤爲出力已革總兵葉常春陳世忠署總兵

已革副將李德麟護總兵已革遊擊周士法署副將
已革遊擊張攀龍尙知愧奮著一併開復原官

十一日 戊寅 英桂奏言湖北麻城賊匪約五六百

名竄至商城之西界嶺馮店等處盤踞經知縣
劉宗岱集勇會同紳弁馳勦該匪聞風退竄該
縣跟蹤緊追擊斃賊匪數十名餘俱竄回麻城
商城現已安靜光山之新店一帶又有逆匪竄

擾經知州趙登峻等分路擊勦該匪抗拒兵勇
點放擡礮轟斃三十餘人又殺手執紅旗賊目
一名紅巾賊二十餘名餘匪均各逃回麻城所
屬之宋埠臣仍嚴飭各州縣照舊團練並飭帶
兵各官扼要防守以杜北竄奏入報

十三日

庚辰

台湧奏言

臣

進紮德安後派署安陸

縣知縣楊大齡等會帶兵壯民團搜捕餘匪並
令佈克慎等馳赴應城攻勦該逆約三四百人
出城抗拒我兵擊斃多名逆衆敗逃追至西門
外河岸擊沈逆船九隻餘匪淹斃殆盡當將城
池收復卽留董玉龍等在城彈壓旋探知天門
縣屬與應城交界之阜市一帶有賊約二千餘
人盤踞該處水路下達涓口陸路可至應城抄

我進兵後路現派佈克慎帶兵勦辦一俟此股殄滅仍令馳赴應城以便由長江埠下游渡湖直出潰口相機進攻兩漢孝感縣自練勇潰散縣城失守至今尙爲賊踞該縣水陸與楊店偏近臣已咨催舒倫保迅將已到綠營官兵星馳前來德安其滿營馬隊官兵卽由孝感縣屬之小河驛直達楊店雙廟進勦藉扼黃州北來陸

路並咨令桂明督飭所統陝甘官兵一千八百
餘員名迅趨黃陂縣屬之灑口與舒倫保會商
步步相機進攻

台湧又奏言查固原提督桂明行抵應山後臣
卽函咨頻催始則覆稱應山喫重舒倫保留其
幫同堵剿繼則咨稱乘馬跌傷骹膀應請寬限
趕緊調治迨桂明來至德安臣察無病容詢其

三三
腰膀亦無擦傷情形西安將軍舒倫保年逾七旬步履蹇澀乘馬頗難當茲軍情萬緊官兵分路進剿非各有統兵大員幫同督剿難以得手不得不據實密陳奏入

上命軍機大臣傳諭台湧曰應城旣經收復德安等處餘匪漸就肅清阜市一帶尙有賊衆盤踞台湧現派佈克慎帶兵馳往剿辦不難迅就殄滅此時黃州漢

鎮大股負固如常兼以楚南逆蹤全行下竄皖江潰敗之匪紛紛駛入上游武昌待援情形何等緊要儻以援兵未到致有疏虞台湧豈能置身事外著該督迅籌進攻之策一面嚴飭佈克慎速將阜市一股滅盡以爲前路之導一面統兵前進探賊所向奮力殲除總期與省城聲勢聯屬庶可爲會合夾攻之計桂明現已行抵德安其所帶官兵皆係勁旅或令該提

督全數帶同進剿或應留若干扼要設防均由台湧酌量調度桂明如不得力卽著隨時叅奏舒倫保旣屬不能助剿著卽傳知來京陛見所有原帶之已到官兵卽歸台湧統帶其未到之後起各隊仍著檄提來營以資攻剿

同日駱秉章奏言逆賊竄踞湘潭經水陸兵勇痛加剿洗零匪四竄臣飭衡山等各州縣先後

截擒潰匪各百餘名維時靖港賊船因逆賊連
日大敗兇渠授首賊黨乘風下駛比塔齊布等
水陸兵勇回軍長沙該逆已由灣河蘆林潭一
帶揚帆下竄經過湘陰岳州等處因舵工水手
逃散遺棄船隻頗多其由醴陵水路逸出餘匪
探由江西萍鄉萬載新昌等縣轉至湖北邊界
會合通城賊匪希圖乘間南犯臣飭知縣陳鑑

源等各帶兵勇相機進剿該逆首隊已至上塔
市知州林源恩督率勇丁暗抄其後各勇直前
衝殺斃賊九十餘生擒賊匪沈連升等五名
官軍卽移營進紮通城九嶺地方該逆分三路
來撲各路約千餘人官軍亦分路迎敵向前衝
殺轟斃紅巾賊匪數十名匪衆敗潰楚勇乘勝
掩殺賊復分踞山頂楚勇亦分路搶上山梁兩

路斃賊數十名生擒六名賊匪奔潰五月初四
日該匪復分三股由間道抄襲官軍後路經訓
導江忠淑等分投迎擊大獲勝仗斃賊數百生
擒數十名賊匪敗退臣據探報有崇通賊匪邀
約蒲圻之賊相助事復添調守備蔣大勝管
帶楚勇六百四十名馳赴平江北界協勦復面
商署提臣塔齊布督領兵勇卽日馳赴岳州相

機防勦奏八

上諭內閣曰此次湖南官軍疊勦竄匪大獲勝仗崇通
賊匪業已大受懲創其 以湖南之賊兇渠多已授

首敗殘餘匪經各州縣兵勇團衆協力截勦湖南近
省地方一律肅清著塔齊布等督領兵勇乘勝追殺
馳赴岳州相機攻勦出力各員弁兵勇著該撫彙案
酌保